



Broj/Broj: 03/1-50-14-7-12/12  
Sarajevo/Sarajevo, 26. 3. 2012. godine

**PREDMET: Informacija o radnoj posjeti Kolegija Zajedničke komisije za odbranu i sigurnost BiH Ministarstvu odbrane BiH, 7. 3. 2012.**

Članovi Kolegija Zajedničke komisije za odbranu i sigurnost BiH (u daljnjem tekstu: ZK) boravili su u radnoj posjeti Ministarstvu odbrane BiH (u daljnjem tekstu: MOBiH) 7. 3. 2012.

U delegaciji ZK bili su: Dušanka Majkić, predsjedavajuća, Borjana Krišto, prva zamjenica predsjedavajuće, Šefik Džaferović, drugi zamjenik predsjedavajućeg, Željko Grubešić, stručni savjetnik, i Jovica Katić, stručni saradnik.

U ime Ministarstva odbrane BiH sastanku su prisustvovali: Muhamed Ibrahimović, ministar, Marina Pendeš i Mirko Okolić, zamjenici ministra, Muhamed Smajić, sekretar Ministarstva, Miro Cabo, Sejo Muratović, Ahmed H. Omerović i Trpimir Rebac, pomoćnici ministra.

Zajednički štab OSBiH (u daljnjem tekstu: ZŠOSBiH) na sastanku su predstavljali: general-pukovnik Miladin Milojević, načelnik, te general-majori Rizvo Pleh i Anto Jeleč, zamjenici načelnika.

Radna posjeta Ministarstvu odbrane BiH organizirana je s ciljem pripreme za raspravu na sjednici ZK o realizaciji Akcionog plana Ministarstva odbrane BiH (u daljnjem tekstu: Akcioni plan), akt MOBiH broj: 04-03-3-4905/11, od 29.11.2011., a koji je dostavljen ZK po zaključcima s radionice o temi: „Zakonodavni okvir, nadležnosti i planovi institucija BiH u oblasti odbrane i sigurnosti“, održane 19. i 20.9. 2011. u Tesliću, a koji su usvojeni na 6. sjednici Zajedničke komisije za odbranu i sigurnost BiH.

U uvodnom dijelu sastanka ministar Ibrahimović pozdravio je prisutne i zahvalio se članovima ZK na interesu za rad MOBiH i iskazanoj želji da pomognu u realiziranju zadataka iz Akcionog plana. Izrazio je nadu da će MO i ZK u ovom mandatnom periodu usko sarađivati na ispunjavanju zajedničkih ciljeva u sektoru odbrane u BiH. Ujedno se zahvalio na informacijama koje je dostavila ZK, koje su usvojene na prijašnjim sjednicama Komisije, a koje su pokazatelj zajedničkih aktivnosti MO i ZK u prethodnom periodu.

**Dušan Majkić**, predsjedavajuća ZK, u uvodnom dijelu zahvalila se rukovodstvu MOBiH i ZŠOSBiH na prijemu Kolegija ZK i poželjela uspješan rad novom rukovodstvu MOBiH u narednom periodu. Naglasila je da je ovaj sastanak samo pripremnog karaktera, kako bi Kolegij ZK s rukovodstvom MOBiH kratko prošao kroz predloženi Akcioni plan. A nakon toga bi ZK analizirala svaku od tačaka Akcionog plana.

Također, prije početka rasprave o Akcionom planu kao prethodno pitanje nametnula je pitanje finansijske naknade lokalnoj zajednici općine Glamoč zbog uništavanja MiMES-a. Upoznala je učesnike sastanka s rezultatima posjete članova ZK poligonu za uništavanje MiMES-a otvorenom detonacijom Glamoč, kao i s detaljima razgovora s rukovodstvom Općine Glamoč. Prilikom te posjete, naglasila je, predložen je sljedeći zaključak: „*Članovi ZK, prilikom razmatranja Prijedloga budžeta institucija za 2012. godinu u domovima PSBiH, podnijet će amandmane koji će ići u smjeru da se iz novčanih sredstava predviđenih za rad MOBiH posebno izdvoje sredstva za korištenje poligona za uništavanje nestabilnog MiMES-a u Glamoču.*“. Istakla je da je ovaj zaključak usvojen na 10. sjednici ZK, te da je na posljednjoj sjednici, održanoj 6.3. 2012., Komisija u okviru tekućih pitanja ponovo raspravljala o ovom pitanju i tom prilikom zadužila MOBiH da iz novčanih sredstava u Prijedlogu budžeta institucija BiH, predviđenih za rad MOBiH za 2012. godinu, izdvoji iznos od 1.000.000 konvertibilnih maraka kao posebnu budžetsku stavku – „*Naknada lokalnoj zajednici općine Glamoč za uništavanje nestabilnog MiMES-a na poligonu „Odlučna Barbara*“. Uručila je rukovodstvu MOBiH pismo s inicijativom za rješavanje ovog pitanja o čemu je neposredno pred posjetu razgovarala i s Vjekoslavom Bevandom, predsjedavajućim VMBiH.

**General-major Rizvo Pleh** istakao je da je bio domaćin članovima ZK u ime ZŠOSBiH na poligonu u Glamoču. Naglasio je da su mu poznati problemi na terenu oko Glamoča, te sugerirao pronalaženje rješenja s ciljem pomoći lokalnoj zajednici Glamoč. Činjenice o stanju u ovoj općini ne treba skrivati jer postoje evidencije nadležnih komandi OSBiH, kao i nadležnih općinskih službi. Posjeta članova ZK Glamoču, prema riječima generala Pleha, predstavlja potvrdu opredjeljenja da se pomogne OSBiH u rješavanju aktuelnih problema.

**General-pukovnik Miladin Miložić** rekao je da je pitanje uništavanja municije i MES-a na poligonima uvijek osjetljivo, i za lokalnu zajednicu, i za OSBiH. Naveo je da su OSBiH upravo na zahtjev lokalne zajednice završile na lokalitetu gdje se nalazi poligon „Odlučna Barbara“, te da je taj poligon pripadnicima OSBiH posljednja odstupnica, s obzirom da su na osnovu ranijih zahtjeva već odstupili iz Kalinovika i s Manjače. Prema saznanjima koje je dobio od predstavnika Ambasade SAD-a u BiH, uvjeren je da će lokalno stanovništvo u općini Glamoč izaći na demonstracije u vezi s aktivnostima OSBiH na uništenju MiMES-a, te je s tim ciljem zamolio da se nađe konačno rješenje kada je ovaj poligon u pitanju. Ako se djelatnosti na ovom poligonu ugase, OSBiH će morati tražiti novu lokaciju za uništenje u BiH, ili, pak, plaćati iznajmljivanje neke od lokacija izvan BiH, kao što je ponudila Makedonija, čime bi troškovi uništavanja nestabilnog MiMES-a bili znatno veći. Od 2006. godine OSBiH su iskazale potrebnu profesionalnost, ali i osjetljivost za lokalnu zajednicu na poligonima gdje se radilo na uništavanju. OSBiH su maksimalno kooperativne i bit će i ubuduće jer to lokalna zajednica očekuje.

**Borjana Krišto** naglasila je da ZK ima izražen senzibilitet za lokalne zajednice. Pitanje poligona Glamoč i svih drugih poligona u BiH treba riješiti MOBiH. Odluka za pomoć lokalnom stanovništvu ne treba biti izoliran slučaj. To treba biti princip za sve poligone OSBiH.

**Mirko Okolić** sugerirao je da je potrebno uraditi nešto za stanovništvo Glamoča. Naveo je da ne bi prejudicirao konačno rješenje, naglašavajući da će ono svakako biti rezultat kompromisa kako bi se na naposljetku riješilo. Prijedlog predsjedavajuće Komisije shvatio je kao prijedlog za dobrobit stanovništva ove općine.

**Šefik Džaferović** podsjetio je na nadležnosti ZK u oblasti parlamentarnog nadzora, jer one predstavljaju prostor za djelovanje ZK na ovom polju. Izrazio je svoj senzibilitet za probleme s kojima se lokalno stanovništvo ove općine susreće, te naglasio da MOBiH treba djelovati u smjeru dobrog i racionalnog rješenja.

**Ministar Ibrahimović** je povodom rasprave o načinu pronalaženja mogućnosti za pomoć stanovništvu Glamoča izrazio opredjeljenje da je obaveza pomoći lokalnom stanovništvu neupitna. Zadužio je svoje saradnike da pronađu način na koji će MOBiH pomoći s obavezom da što prije pripreme konkretne prijedloge. Tražio je da se to razmotri kao princip. Kada je u pitanju pomoć stanovništvu Glamoča, sugerirao je da i MOBiH i ZK djeluju zajedno i da će se inicijativa predsjedavajuće Komisije podržati u mjeri u kojoj će i stanovništvo Glamoča i OSBiH biti zadovoljne.

Nakon rasprave o inicijativi za pomoć lokalnom stanovništvu općine Glamoč, rukovodstvo ZK, MOBiH i OSBiH razgovarali su o realizaciji Akcionog plana MOBiH, te ukratko analizirali svaku od tačaka predloženog Akcionog plana kako slijedi:

### ***1. Stanje materijalno – finansijskog računovodstva u MOBiH***

**Dužanka Majkić** navela je da je nevjerojatno da u okviru MOBiH još uvijek, osam godina nakon uspostavljanja ovog ministarstva na državnom nivou i jedinstvenih Oružanih snaga, nije uspostavljeno materijalno-finansijsko računovodstvo. Njegovo uspostavljanje ocijenila je kao „zadatak svih zadataka“. Ocijenila je nedopustivom činjenicu da nije ustrojen jedinstven informacioni sistem za vođenje materijalno-finansijskog računovodstva. Navela je da je važeći Pravilnik o finansijskom i materijalnom poslovanju u MOBiH i OSBiH dokument koji je donesen još početkom 2007. godine, a predstavlja kopiju pravilnika s kojom se služila bivša JNA. Naglasila je kako smatra da nije adekvatan da bi regulirao ovu oblast, da nije usaglašen ni s društvenim sistemom zemlje, a ni s novim standardima.

**Miro Cabo**, pomoćnik ministra, istakao je da su problemi materijalno-finansijskog poslovanja daleko složeniji nego što su opisani u poglavlju Akcionog plana. Materijalno knjigovodstvo formirano je u vrlo teškim okolnostima. Tri vojne komponente i složenost u procesu evidencije stvorili su dodatni problem. Status perspektivne i neperspektivne imovine dodatno usložnjava problem materijalno-knjigovodstvene evidencije. Pomoćnik ministra Cabo osvrnuo se i na problem imovine entiteta kao i iskazivanja stvarne vrijednosti jer skoro dvije godine se radi na izradi novog koncepta i licenciranju potrebnog kadra. Entiteti sporo

preuzimaju sredstva koja im pripadaju s tim da treba istaći činjenicu da su nadležni organi Vlade Republike Srpske preuzeli oko 33% pripadajućih sredstava za razliku od Federacije BiH gdje još uvijek nije počela realizacija. Izrazio je nadu da će brzo doći do instaliranja softvera koji će pomoći rad ovom dijelu MOBiH i OSBiH, te zaključio da je u dosadašnjem periodu ipak urađen veliki posao koji se ogleda u uspostavljanju imenika sredstava i nomenklature od 72.000 stavki.

## ***2. Plan i rokovi izvršenja popisa oružja i MiMES-a u svim skladištima OSBiH***

**Dušanka Majkić** ukazala je na značaj popisa sredstava u magacinima naoružanja i municije, gdje su samo nakon tri pregledana skladišta uočeni brojni nedostaci pa i pokazatelji na određeni broj krivičnih djela, o čemu postoji i službena evidencija. Predstavnik MOBiH i ZŠOSBiH pitala je kada će biti završen popis svih skladišta.

**Miro Cabo** naveo je da su formirane komisije za popis koji je počeo 1. 11. 2011. Naveo je da će ZK imati na raspolaganju sve zapisnike ovih komisija za popis. Rezultati popisa bit će obznanjeni kroz izvještaj centralne popisne komisije.

**General – pukovnik Miladin Miložić** naveo je da je popis svih skladišta OSBiH i u okviru njega cjelokupnog naoružanja izvršen u periodu od 1. 11. 2011. do 15. 1. 2012.

**Trpimir Rebac**, pomoćnik ministra za nabavku i logistiku, naveo je da nikada nije izvršen popis skladišta. Tek nedavno od 12 skladišta popisano je stanje u tri i tom prilikom nađeno zabrinjavajuće stanje s velikim manjkom. Na rasvjetljavanju uočenih slabosti angažirani su nadležni istražni organi i Tužilaštvo BiH.

## ***3. Ostala vojna imovina***

**Dušanka Majkić** ukratko je ukazala na zastoj u rješavanju ostale vojne imovine.

**Trpimir Rebac** naveo je da je Vlada RS-a od 49. 190 stavki preuzela ukupno oko 15.500 stavki, što predstavlja 30 %, dok je Vlada FBiH u velikom zakašnjenju i od 10.890 stavki preuzeli su samo dva agregata, što je veliki problem za OSBiH.

## ***4. Ispunjenje procedura javnih nabavki***

**Dušanka Majkić** navela je uočene propuste u poštivanju procedura javnih nabavki što je iskazano kroz revizorske izvještaje više godina zaredom.

**Trpimir Rebac** ukratko je upoznao Kolegij ZK s detaljima koji su važni za proces javnih nabavki u MOBiH i OSBiH.

Kada je u pitanju nabavka uniformi, rekao je da su i tu uočene nepravilnosti. I proces nabavke uniformi za potrebe OSBiH je predmet istrage.

### **5. Informacija o stanju personala**

**Dušanka Majkić** izrazila je nezadovoljstvo činjenicom da su prilikom posljednje dvije organizacije konferencije o stanju personala u MOBiH i OSBiH bili pozivani brojni gosti, ali nikada i predstavnici ZK, te je u tom smislu zamolila predstavnike MOBiH da se ta negativna praksa u budućnosti promijeni.

**Sead Muratović, pomoćnik ministra za personal**, zahvalio se predstavnicima ZK na učešću na Konferenciji o temi: „Proces napredovanja profesionalnih vojnih lica – jednake mogućnosti za prekategorizaciju i unapređenje uz poštivanje principa transparentnosti“, čiji je organizator bio parlamentarni vojni povjerenik BiH. Naveo je da je Konferencija rezultirala izradom novog Pravilnika o prijemu (profesionalnom razvoju i upravljanju karijerom) i Prednacrtu pravilnika o unapređenju i prekategorizaciji. Istakao je da ima problema u provođenju definirane politike vođenja personala, ali da je stanje dobro. Saglasio se s činjenicom da predstavnici ZK treba da budu sastavni dio budućih konferencija o stanju personala u MOBiH i OSBiH, te obećao rukovodstvu ZK da će, zajedno sa svim ostalim članovima Komisije, biti pozvani na 5. konferenciju o analizi personala u MOBiH i OSBiH. Još je naveo da su ostvareni veliki pomaci u sređivanju stanja jer je baza podataka urađena po standardima koji su učinili sistem vođenja personala transparentnim i efikasnim.

### **6. Informacija s potrebnom dokumentacijom o remontu helikoptera MI-8 i MI-17, te nabavci uniformi za pripadnike OSBiH**

**Dušanka Majkić** izrazila je nezadovoljstvo dostavljenim materijalima po pitanju remonta helikoptera, naročito zbog činjenice što su kao prilozi Komisiji bespotrebno dostavljeni brojni zapisnici, zaključci, elaborati i sl.

**Trpimir Rebac**, pomoćnik ministra odbrane BiH, naveo je da su stanje i ispravnost helikoptera takvi da njihova operativnost nije upitna. Naveo je da su helikopteri OSBiH u protekloj godini imali ukupno 2.290 sati leta, te da su svi helikopteri valjano servisirani. Garancija za servis svakog helikoptera je 300 sati ili 24 mjeseca (u zavisnosti od toga šta prije istekne). Podsjetio je prisutne na teškoće s kojima se pripadnici OSBiH susreću kod remonta helikoptera, a one se uglavnom odnose na nabavku rezervnih dijelova, MTS-a i maziva.

**General – pukovnik Miladin Milojević** naveo je da je protekle sedmice završen i elaborat u vezi s padom helikoptera OSBiH prilikom dostavljanja humanitarne pomoći stanovništvu općine Kalinovik, usljed izrazito nepovoljnih meteoroloških uslova, te istakao da se taj elaborat čuva u Komandi zračnih snaga. U elaboratu je navedeno da se ne radi o greški posade, da se ne radi o otkazivanju tehnike, te da je helikopter izgubio kontroku usljed jakog udara na njegov upravljački dio koji se nalazi na repu helikoptera. Sretnu okolnost predstavlja

činjenica da je u tom trenutku helikopterom upravljao komandant 2. helikopterskog eskvadrona.

### ***7. Informacija o trenutnom statusu izrade „Pregleda odbrane“***

**Dušanka Majkić** ocijenila je da niko od predstavnika ZK ne zna šta se dešava kada je u pitanju izrada dokumenta „Pregled odbrane“. Izrazila je nezadovoljstvo činjenicom da su na posljednju plenarnu diskusiju u vezi sa izradom dokumenta „Pregled odbrane“ između predstavnika Štaba NATO-a u Briselu i MOBiH i OSBiH bili pozvani predstavnici Ureda sekretara Komisije, a ne i članovi ZK.

**Marina Pendeš** navela je da „Pregled odbrane“ predstavlja zajednički cilj, te da Predsjedništvo BiH treba što prije razmotriti elemente važne za izradu „Pregleda odbrane“. To će biti olakšanje za cjelokupan proces. Smatra da MOBiH treba svoje aktivnosti temeljiti na daleko osmišljenijoj medijskoj prezentaciji. Često dobro urađene stvari ostaju nezapažene. Obavezala se da će učiniti daleko više sa svojim saradnicima na prezentiranju i populariziranju aktivnosti MOBiH i OSBiH, te navela da će „Pregled odbrane“ u skorije vrijeme biti prezentiran svim članovima ZK.

**General-pukovnik Miladin Milojević** istakao je da je ZŠOSBiH poslao svoje viđenje „Pregleda odbrane“ radnoj grupi koja na njemu radi. Ocijenio je da će se svi udaljiti od postavljenih ciljeva ako se ne daju jasni politički stavovi. „Pregled odbrane“ treba da sadrži jasan i usaglašen politički stav o pravcima i ciljevima koje on treba sadržavati.

**Šefik Džaferović** naveo je da BiH ne treba da bude izuzetak u odnosu na države u okruženju kada je u pitanju postojanje ovog dokumenta, te ocijenio da je dobro da ZK bude upoznata sa svim elementima prijedloga „Pregleda odbrane“ na način kako je to navela zamjenica ministra. Istakao je da se o veličini i strukturi OSBiH ne može razgovarati bez jasnih političkih stavova, gdje treba uvažiti Aneks 1B Dejtonskog mirovnog sporazuma.

### ***8. Informacija o dinamici predaje neperspektivnih lokacija civilnim vlastima, rješavanja viškova MiMES-a i drugih sredstava***

**Trpimir Rebac** naveo je da je s neperspektivnim lokacijama situacija takva da od 42 lokacije pripadnici OS i dalje osiguravaju njih devet. To godišnje Bosnu i Hercegovinu košta oko 2 miliona KM. Lokalnoj zajednici odmah se može predati 17 lokacija. Čeka se da Vlada FBiH preuzme 15, a Vlada RS-a još dvije lokacije, te je, u skladu s tim, zamolio da se utiče na Vladu FBiH s ciljem što skorijeg preuzimanja ovih lokacija. Još je naveo da je trenutno u magacinima uskladišteno 18 400 tona MiMES-a i s tim podatkom treba raspolagati kako u osiguranju sredstava za čuvanje, tako i u procesu uništavanja, korištenja i svega drugog što utiče na to stanje.

**9. Informacija o stepenu realizacije zadataka koji su definirani godišnjim planom MOBiH i ZŠOS BiH za 2011. godinu (zaključno sa 30. 9.)**

**Ahmed H.Omerović**, pomoćnik ministra za planove, istakao je da Godišnji izvještaj o radu MOBiH sadrži brojne pokazatelje o kojima treba raspravljati jer podaci su egzaktni i uvjerljivi. Oni nisu u svemu onakvi kakve su željeli. Slika su stvarnosti u kojoj pored subjektivnih ima i slabosti na koje se nije moglo uticati.

**10. Prijedlozi potrebnih dopuna zakonskih i podzakonskih akata**

**Muhamed Smajić**, sekretar MOBiH, govorio je o zakonskom okviru za rad MOBiH. Brojni prijedlozi rješenja su na čekanju i potrebno ih je aktivirati kako bi rad MOBiH bio efikasniji.

Na kraju radnog sastanka i rasprave o temi akcionog plana po zaključcima ZK, koji je ocijenjen korisnim i sastankom koji će opredijeliti brojne tokove u rješavanju aktuelnih problema MOBiH, **zaključeno** je sljedeće:

- 1. Ministarstvo odbrane BiH treba izraditi novi akcioni plan dovodeći ga u realne okvire s preciznim rokovima, izvršiocima i definiranim aktivnostima koji će efikasno riješiti nagomilane probleme u MOBiH.**
- 2. Treba urgentno osigurati sve ono što će rad MOBiH učiniti efikasnim. ZK treba do kraja 2012. godine analizirati svako tematsko poglavlje definirano u Akcionom planu. Nakon što dobije realnu sliku stanja i prijedloge rješenja, organizirat će raspravu uz prisustvo najodgovornijih lica iz rukovodstva MOBiH i ZŠOSBiH.**
- 3. Praksu međusobnih susreta i posjeta treba nastaviti s ciljem otklanjanja trenutnih problema i ispunjavanja obaveza koje su definirane na radionici o temi: „Zakonodavni okvir, nadležnosti i planovi institucija BiH u oblasti odbrane i sigurnosti“, održane u Tesliću 19. i 20. 9. 2011.**
- 4. Tematske sjednice ZK po pojedinim tačkama novog Akcionog plana treba pripremati u saradnji s predstavnicima MOBiH.**
- 5. Pozivanje članova ZK na sve buduće aktivnosti, koje bude organiziralo MOBiH, a na kojima se raspravlja o pitanjima koja proističu iz Akcionog plana MOBiH i OSBiH treba biti praksa u kojoj se treba razviti veće povjerenje i partnerski odnos s ciljem rješavanja otvorenih pitanja.**
- 6. Rad u sektorima MOBiH i ZŠOSBiH treba učiniti djelotvornijim i efikasnijim, te na taj način riješiti probleme koji su izneseni tokom ovog sastanka.**

- 7. Ohrabruje se stav novog rukovodstva MOBiH da nagomilani problemi treba da se rješavaju sistemski u dobroj saradnji sa ZK. Kroz novi Akcioni plan treba krenuti u realizaciju aktivnosti kojima cjelokupno stanje u MOBiH i OSBiH treba značajno poboljšati.*

Predsjedavajuća Zajedničke komisije

**Duška Majkić**

Dostavljeno:

- naslovu
- a/a